

CONVIVENZA

Il popstar

PIEDER CAMINADA

Ussa ch'els èn tuts morts poss jau raquintar l'istorgia. Bain solevan ils vegls Romans dir: «De mortuis nil nisi bene.» Pia: «Dals morts duain ins be dir dal bun.» Però mia istorgia na raquinta betg mo dal mal. Igl è in'istorgia, en la quala betg tut n'è mo nair ubain alv – era sche jau l'hai chapì pir decennis pli tard.

Ina damaun da primavaira l'onn 1964. Da la punt dal Rain da Glion enà charrescha in Simca blau en direziun da la Casa Cummin ch'era da lez temp anc la chasa da scola da Glion. Sco sin commando sa furma ina rotscha uffants che curra sbragind en direziun dal Simca. E cura che l'auto sa ferma finalmain davant l'ustaria «Mundaun», sa stauscha in bardigliun da scolaras e scolars enturn il Simca. Insatgi avra la porta da l'auto, per che scolast X. possa sortir. Igl è sco l'arrivada d'in popstar.

Paucs meters dasperas stattan ils auters scolasts da Glion ed observan cun egl critic la scenaria. Tar lur atgna arrivada n'avevi betg dà givels d'allegria uffantils. Las scolaras ed ils scolars han bain salidà curtaschailmain ils scolasts che valan sco persunas da respect. Dapli betg.

Atgnamain finescha quama istorgia. Natiralmain pudess jau la raquintar vinavant enfin il davos detagl. Ma pertge? Primo sa re-



petiss l'istorgia adina puspè causa dal ritual matutin dal Simca e secundo raquintass jau ella franc memia subjectivamain. Tant saja tuttina tradi: Scolast X. era tar nus scolars da la secunda e terza classa primara extremamain popular, ses collegas da lavur dentant main – per formular quai en furma in zic discreta. Per ina buna part eran questas «persunas da respect» nuncharezzadas dentant era sezzas la culpa. Pertge ch'ellas n'avevan naginas retegnientschas d'ans dar ina tschatta dolurusa ubain ina enturn las ureglias, sche nus n'ans deportavan betg sco ellas chattavan per bun. Scolast X. era auter. El ma n'ha mai chastià fisicamain; i na dat almain en mia memoria betg «nattas». El era giuven, dinamic – talmain different dals auters. Nus mattets al chattavan super, essend ch'el deva ballape. E las mattettas eran tuttas in zic inamuradas en il scolast giuven attractiv.

Malgrà che jau era da lez temp anc in rambottel senza experientscha da vita, ma deva noss «cult da fans» per scolast X. min

tgatant da patratgar. Jau ma dumandava co che quai stoppia esser per ils auters scolasts ed oravant tut per lur agens uffants che gievan era a scola a Glion. Pertge che en sasez n'era il bardigliun d'uffants che sa furmava mintga damaun enturn il Simca blau da scolast X. nagut auter ch'in rating da scolasts brutalmain sincer. Enfin che scolast X. ha puspè bandunà Glion – per nus dal tuttatafatg nunchapibel.

Blers onns pli tard hai jau emprendì d'enconuscher meglier intgins dals scolasts bainduras odiads da mai. Jau sun vegnì a savair ch'era els avevan lur bunas varts. Ch'els eran daventads per ina buna part l'unfrenda da lez temp, perquai che la societad spetgava dals scolasts ch'els hajan quità da disciplina ed urden. Ed jau hai er udì da conscolaras e conscolars che perfin noss scolast X., declerà da nus quasi sontg, na saja betg stà senza macla. Ch'il «popstar» da nossa scola n'haja betg giugent tschertas scolaras e tscherts scolars ed haja rendì la vita (scolara) dira ad ellas ed els. Era per popstars vala pia: Betg tut quai che glischa è aur.

La convivenza da las linguas e culturas en il Grischun – quai è il tema da la columna «Convivenza» che cumpara mintga glindesdi en la Südostschweiz ed en La Quotidiana.

Pieder Caminada è mainaproject scolaziun e redactur tar la «Südostschweiz». El è creschì si a Glion en in ambient per gronda part tudestg e viva oz en il vitg rumantsch da Castrisch.